

Wien, 19. Oktober 1568

Von Joachim Camerarius d. Ä.

Druck: Camerarius, Epistolae S. 488f.

S. D. Inter trita veterum dicta et hoc fertur, quod ex quodam Comico retulit Athenaeus: διάμεστον ὄντα παραγεύσασθαι τίνος καινοῦ, διπλασίαν παρέσχεθ' ἡδονήν. Id de epularum varietate pronunciatum, multo verius esse experior, quoties litterae amicorum eruditorum mihi afferuntur, quorum sermonem edere secundum Plautum liceat. Iampridem enim huius quasi ἔστιάσεως ad quam inuitatus fui, satur sum: in ipso adeò apparatu, necdum conuiuis congregatis, ὃν πάνυ πόρρωθέν τινες προσκαλοῦνται. Etsi gratissima ἡδύσματα praebet nobis consuetudo hospitis mei summi viri et amici Cratonis, qui me et pascit opiparè et colloquijs iucundiss[imis] recreat. Quibus tamen ipsis nouae suauitatis aliquid accessit ex litteris tuis tam ad illum quàm me scriptis. Sanè molestum mihi est, tam diu hīc me detineri, sed tempori scilicet seruendum est. De quibus autem scribis, ea quamuis sint deploranda, longa dies tamen veluti callum obducere potuit stomacho, vt minùs dolenter ferantur. Neque res etiam in isto periculo τῆς μεταξύτητος, vt ita appelle, versatur. Cùm de doctrina nulla moueatur controuersia, quantum ego quidem scio atque noui, et praescribi tantùm consentanea exercendi illam ratio, et ordinis postuletur obseruatio, ὥστε πάντα εύσχημόνως καὶ κατὰ τάξιν γίνεσθαι. In quo certè elaborari pium est et religiosum, vt salutaris Euangelij doctrina non sit expers sanctitatis disciplinae. Hoc igitur agi mihi est persuasum. Qui verò euentus futuri sint, nouit Deus. In quem studeo reijci curas meas et fieri officium. πρὸς ταῦτα θ' ὁ Κλέων. nosti caetera. Tuam valetudinem et ipsam affligi molestè fero. ἀλλὰ ἐπειδὴ πρὸς τῷ καταβιβάζοντι ἀπὸ τοῦ ἀναβιβάζοντος πάλαι ποτὲ γεγόναμεν, hoc etiam incommodum aequo animo est ferendum. Tuas litteras si interdum curaueris ad nos perferendas, rem gratiss[imam] mihi feceris. Peto abs te, vt meo nomine officiosè salutes D. Ioannem Baptistam Hencelium. Te bene valere cupio. Vale. Viennae Austriacae. 19. D[ie] M[ensis] VIIIbris. 68.